




ՎԻՐԱՀԱՅՈՑ ԹԵՄՈՒՄ

Մայիսի 27-ին, ուրբաթ.—Թբիլիսիի Ս. Գևորգ Մայր տաճարի բակում հանգչող մեծ գուսան Սայաթ-Նովայի շիրիմը վերստին իր շուրջն էր համախմբել քնարերգության սիրահարներին։ Սայաթնովյան 80-րդ Վարդատունը վերստին հավաստեց սիրո, բարության, արվեստի չխամրող հմայքը։

Հանդեսի սկզբում Տ. Գևորգ եպս. Սերայդարյանը, հոգևոր դասի մասնակցությամբ, հոգեհանգստյան պաշտոն մատուցեց Սայաթ-Նովայի շիրիմի մոտ։

Հոգեհանգստից հետո կատարվեց Վարդատունի բացումը։ Տոնահանդեսի մասնակիցներին Վրացական պետության ղեկավար Էդուարդ Շևարդնաձեի անունից ողջունեց տիար Սանդրո Կավսաձեն։

Ելույթ ունեցան Վրաստանի հայ մտավորականության ներկայացուցիչները և հյուրեր Հայաստանից։

Վերջում Առաջնորդարանում տրվեց հոգեհաշ։

* * *

Մայիսի 28-ին, շաբաթ։ Աջարիայի «Վերածնունդ» հայկական բարեգործական մշակութային ընկերության հրավերով Բաթումիում էր գտնվում Վրաստանի մշակութային ընկերության պատվիրակությունը։ Պատվիրակության կազմում էին ՀՀ փոխվարչապետի աշխատակազմի ղեկավար Փիլիպոսյանը, Վրաստանում Հայաստանի գործերի ժամանակավոր հավատարմատար Լևոն Խաչատրյանը, Վիրահայոց թեմի առաջնորդ Տ. Գևորգ եպս. Սերայդարյանը, Վրաստանի հայկական մշակութային բարեգործական ընկերության նախագահ Հենրիկ Մուրադյանը և ուրիշներ։

Մայիսի 29-ին, կիրակի: Բաթումիի Սուրբ Փրկիչ եկեղեցում տեղի ունեցավ կիրակնօրյա քարոզ և մեղքերի թողության արարողություն, որը կատարեց Վիրահայոց թեմի առաջնորդ Ս. Գևորգ եպս. Սերայդարյանը:

1992-ի փետրվարի 26-ին Աջարիայի Հանրապետության նախագահ տիար Ասլան Աբաշիձեի կողմից տեղի հավատացյալ հայկական համայնքին հանձնած Սուրբ Փրկիչ եկեղեցին նորոգվում է և շուտով իր դռները կբացի հազարավոր հավատացյալների առաջ:

* * *

Հունիսի 5-ին Թբիլիսիի Ա. Գևորգ Մայր եկեղեցում տեղի ունեցավ սարկավագական ձեռնադրություն:

Վիրահայոց թեմի առաջնորդ գերշ. Ս. Գևորգ եպիսկոպոս Սերայդարյանը սարկավագ ձեռնադրեց դպիր Հովհաննես Հարությունյանին:

Այնուհետև, հունիսի 11-ին, շաբաթ օրը, նույն եկեղեցում, երեկոյան ժամերգությունից հետո, Հովհաննես սրկ. Հարությունյանը ստացավ քահանայական կոչում:

* * *

Հունիսի 12-ին, կիրակի օրը, Երկրորդ ծաղկազարդի տոնին, Ա. Գևորգ Մայր եկեղեցում ս. պատարագ մատուցեց գերաշնորհ Ս. Գևորգ եպիսկոպոս Սերայդարյանը և, հրնթացս ս. պատարագի, ամուսնացյալ քահանա ձեռնադրեց բարեշնորհ Հովհաննես սարկավագ Հարությունյանին՝ վերանվանելով նրան Ս. Հուսիկ քահանա:

Ս. Հուսիկ քահանա հայրը ծնվել է 1970 թ. հունիսի 18-ին՝ ավագ քահանա Ս. Եղիշեի ընտանիքում: Ամուսնացած է, ունի դուստր: 1987-ին ավարտել է Թբիլիսիի թիվ 93 դպրոցը, այնուհետև մեկնել զինվորական ծառայության: 1992-ին ավարտել է հոգևոր ճեմարանի քահանայական դասընթացները Ա. Էջմիածնում:

Իր հոգևոր ծառայությունները Ա. Գևորգ Մայր եկեղեցում նորընծա քահանան կսկսի 40-օրյա պահեցողության և աղոթքից հետո:

* * *

Հունիսի 17-ին, ուրբաթ: Թբիլիսիի Ա. Գևորգ Մայր եկեղեցում, ժամը 11-ին, կատարվեց հոգեհանգստյան պաշտոն՝ նվիրված Հայ մեծ բանաստեղծ Պարույր Սևակի և նրա տիկնոջ՝ Նելլի Մենադարաշվիլի-Ղազարյանի եղերական մահվան 23-րդ տարելիցին:

Հուզիչ դամբանական խոսքով հանդես եկավ գերշ. Ս. Գևորգ եպս. Սերայդարյանը:

Արարողությանը մասնակցում էին հայ և վրաց մտավորականներ, ուսանողներ և ուխտավորներ: Վերջում առաջնորդարանում տրվեց հոգեճաշ:

* * *

Հունիսի 19-ին, կիրակի.—Տոն Հոգեգալստյան: Թբիլիսիի Ա. Գևորգ Մայր եկեղեցում պատարագ մատուցեց Ս. Եղիշե ավագ քահանա Հարությունյանը:

Թումանյանական այս օրերին վիրահայությունը ևս անմասն չմնաց Ս. Գևորգ եկեղեցում մատուցվող պատարագին: «Հայր մեր»-ից առաջ գերշ. Ս. Գևորգ եպիսկոպոսը հավուր պատշաճի իր քարոզից հետո վեր հանեց Հ. Թումանյանի անմահ հիշատակը, որին հաջորդեց հոգեհանգստյան պաշտոնը:

Հավարտ ա. պատարագի կատարվեց Մաղթանք Հայրապետական՝ 1441-ին Կաթողիկոսական Աթոռը Սիս անտավայրից Ս. Էջմիածին փոխադրության առթիվ:

Առաջնորդարանում կազմակերպած հյուրասիրությունից հետո, ուխտավորները ուղևորվեցին դեպի քաղաքի Խոջիվանքի հայկական մշակույթի գործիչների Պանթեոն և թարմ ծաղիկներ դրեցին Մեծ Լոռեցու շիրմաքարին:

* * *

Հունիսի 23-ին, հինգշաբթի: Թբիլիսիի Սուլխան Սաբա Օրբելիանիի անվան մանկավարժական ինստիտուտի Հովհաննես Թումանյանի անվան լսարանում տեղի ունեցավ բանասիրական ֆակուլտետի հայկական բաժնի շրջանավարտների հրաժեշտի ցերեկույթը, որը բացեց հայ գրականության ամբիոնի վարիչ, դոցենտ Էմմա Ախուրյանը:

Շրջանավարտներին ողջունեց և Միջազգային Հայկական Համաժողովի Թբիլիսիի մասնաճյուղի անունից նվերներ հանձնեց տիար Գիվի Շահնագարը:

Գերազանցիկ շրջանավարտներ Ռիմա Զորանյանը (Ախալցխա) և Խաթումա Ղարազուլյանը (Բաթումի) պարգևատրվեցին Վիրահայոց թեմի առաջնորդ Ս. Գևորգ եպս. Սերայդարյանի կողմից:

* * *

Հունիսի 26-ին, կիրակի.—Տոն Եղիա Մարգարեի: Թբիլիսիի Ս. Գևորգ Մայր եկեղեցում ա. պատարագ մատուցեց Ս. Հովհաննես ավ. քհն. Դանիելյանը:

Հավարտ ա. պատարագի գերշ. Ս. Գևորգ եպս. Սերայդարյանը դամբանականով հանդես եկավ կոմս Լոռիս Մելիքովի ծննդյան 170-ամյակի առթիվ (Միքայել Լոռու Մելիքյան): Դամբանականից հետո կատարվեց հոգեհանգիստ կոմս Լոռիս Մելիքովի (1824—1888) գերեզմանի մոտ, ուր թաղված են նաև գեներալ-լեյտենանտ Արշատ Տեր-Ղուկասյանը (1819—1881), գեներալ-ադյուտանտ Հովհաննես Լազարյանը (1820—1879), գեներալ-մայոր Բեհբութ Շեշկովիկյանը (1837—1878):

Հիշատակի օրվա կապակցությամբ Առաջնորդարանում տրվեց հոգեճաշ: